

Li bènîtî du « Roudje Pichoulit »

Pîce pou lès djon.nès djins (1 acte)

- **pièce comico-sociale** (langue utilisée: ouest-wallon)
- **9 personnages**
 - >>> **4 jeunes filles**
 - >>> **5 jeunes hommes**
 - (>>> **Autres possibilités**)
- Le texte et la partition musicale de la chanson « Nos-èstons lès bèrdjîs » (Pages 9 & 10 de la brochure) peuvent être obtenus chez l'auteur sur simple demande. >>> 071/21 31 51
- Le document peut être téléchargé.
- Répertoire Sabam

Auteur : **Pol Bossart**
Les Acacias, 6,
5651 Somzée.
Tél. fixe : 071/21 31 51
Portable : 0476 95 03 57
Courriel : polbossart@belgacom.net

Li bènîtî du « Roudje Pichoulit »

Pîce pou lès djon.nès djins

Pol Bossart
Les Acacias, 6 ,
5651 Somzée.
Tél. : 071/213151

Pèrsonâdjes.

Lulu in bribeû qui n'a pont d'twèt
Bruno èn ach'teû di mwéjès-ièbes
Li gârçon li chèrveû du « Roudje Pichoulit »
Cynthia ène fîye qui vôleut div'nu ârtisse
Ârmand in bribeû qui djoûwe dèl guitare
Mârgot ène bribeûse...qui bwèt bén
Lysiane ène feume qui cache après èn-ome
Manu in fournicheû di mwéjès-ièbes

Li mèsse du djeu

+++++

Dècôr.

Ène pitite place èwou ç'qu'on a mètu dès tâbes pou lès pratikes du cabarèt « Ô Roudje Pichoulit ».

LI BÈNITÎ DU « ROUDJE PICHOLIT »

Sin.ne 1. (Lulu, Bruno).

Lulu, qui n'a pont d'twèt, bèroûle pa t' t-avô tous lès tch'mins an cachant après ène place qui li convént.

I pôrte ène vîye casse atatchîye a s'cô èyèt qui pint su si stoumak, ène couvèrte su s' gôche sipale èyèt dès cârtons pa d'zous s'dwèt brès.

Il-arive an plin mitan d'ène place èwou ç' qui dès tâbes ont stî mètûwes pou lès pratikes du cabarèt « Ô Roudje Pichoulit ».

Lulu (Intère è sin.ne, l'ér' fôrt scan, èyèt an trin.nant sès pîds).

A ! Qwè-ce qui mès panârd mi féyenut mô ! I s'ra Bén råde tins qui dji m'trouve dès noûvès pompes. Èyèt fwè d'Lulu, ça m'f'reut droidemint pléji ètou di discouru in p'tit cwin pou p'lu z-î amantchî toutes mès cacayes ... Dji couminche à z-èn-n-awè pa d'zeû l'cokmwâr di m'tapér dès kilomètes èt dès kilomètes pou dès crottes di soris.

I s'arète in momint, riprint s'n-alène, èyèt d'in seûl côp, drouve sès-ouys grand-t-ô lôdje. I vént d'vîr in bia p'tit cwin pour li fé s'nid.

Mins dijèz-m' qui dj'rève on ! Bè, li v'la mi p'tit nid , ... mi tère promîje, ... mi flori payis ...

Ça pâ-ègzimpe ! ... Li Paradis qui m'èst ofru su in platia ! (Sclatant d'rîre). Dji dîreu min.me su in platia d'cabarèt. È Bén, Lulu, tu pous z-asseûrer qu'ôdjoûrdu, t'as l'baraka avou twè in !

I tchét a spales su Bruno, achîd a ène tâbe su l'tèrresse du cabarèt.

Li manière d'îesse da Bruno è-st-à pôrt dès-ôtes. (Marone è nwêr jean, t-shirt nwêr fôrt clapant, roudje foulârd a s'cô, long paletot è cûr, nwêr tchapia su s'tièsse. Il-a dès longs nwêrs tchivias satchîs aviè li d'drî, avou ène keuwe èt dès longs pîs d'gayole. I pôrte dès bâgues a sès dwègts. Il-a dès nwêrès bèrikes).

Il-a l'ér' fôrt èfeuwè èyèt riwéte si monte pus souvint qu'a s'toûr.

I n'èst nèn co chèrvu.

Lulu Ô Bén, vî cous', on n'pout nèn dîre qui vos avèz l'tièsse d'in jwèyeûs fièsteû in vos... Ène sakwè qui va d'truviès quékefiye ?

Bruno (Toussant d'ène nèrveûze manière). Um' ... um'.

Lulu Â , dji wè ! Vos-avèz in tchèt dins vo goyî.

Bruno (Pus fôrt). Um' ... um' ... um'!

Lulu Ô la, a vo place, dj'îreu vîr in mèdecén sins tôrdjî savèz, m'fi.

Bruno Disgadjàz!

Lulu Dji m'lome Lulu, ... Lulu, li léjionére. Èyèt vos ?

Bruno « Disgadjà », vos compurdèz çu qu'ça vout dîre ?

Lulu Oyi, oyi, bèn seûr, mins a m'n-idéye, pou d'vizér insi, vos d'vèz awè ène grosse aroke su vo stoumak. Dji m'va cachî a vos-édî.

Bruno Wôrs di m'vûwe, vos di-dje, puwant tasson.

Lulu Vos-èstèz tél'mint simpa qui dj'vos ofrireu voltî in còp d'roudje téns, mins come dji n'é nén in liârd dissus mi ... Vos n'èn-n-ôriz nén iun, vos, azârd ? (I tint s'mwin).
(Bruno tôurne si tièsse di l'ôte costè).
I fôra seûremint du tins, mins dji sin qu'on va fini pa div'nu soçons nos-ôtes deûs.

Bruno Asteûre, c'è-st-assèz, vos mètèz lès d'bouts ou dji vos spotche come ...

Li g.s.m. da Bruno sone.

Lulu (Su l'ôte costè, al publik). Ç'ti-là, si p'tite caracole l'ôreut lèyî tchér qui ça n'mi sézireut nén.

Bruno (Discrotchant). (Bruno ?) **Wèy'.** (Djusse in p'tit mèssâdje.)... **Wèy'.** (Bén èv'ci, li livrance èst rastôrdjîye.) **Comint ça li livrance èst rastôrdjîye ?** (I s'fét qu'on n'a seû coude l'ièbe, lès vatches ont tout mougî.) **On n'a seû coude l'ièbe, lès vatches ont tout mougî !?** (Lulu choûte li dèvizè èyèt d'meure tout sbarè.)... **Èyèt m' comande d'abôrd ?** (On va wéfi d'trouvèr èn-ôte pachi.) ... **On cache après èn-ôte pachî ?** (Oyi, oyi, on vos chèrvira come conv'nu, mins ène miyète pus tôrd.) ... **Èyèt a quéne eûre adon ?** (Si tout va bèn, gn-ôra nén d'trop d'astôdje.) **Ça va, dji ratind... Min.me place, toudi dins l'bènitî du Roudje Pichoulit, come conv'nu?** (On n'candje rén..) **Salut !**
(Bruno racrotche).

Lulu Si c'èst dè l'ièbe qui vos avèz dandji, dji pou...

Bruno (Qui s'astampe èyèt print Lulu pô goyî). Ç'còp-ci, man.nèt bribeû, tu vas trop lon in, dji m'va t'ramoûre, ... gn- t'cèrvia qui va rèche pa tès orâyes ...

Lulu Ô s'coûrs ! A l'éde !

Bruno (Qui lache tout d'chûte Lulu). T'as dèl tchance qui dj'é peû di m'èbèrnatér, sins qwè ... Si tu téns à t'vîye, tu n'm'as nén vèyu èyèt tu n'as rén ètindu. Mèssâdje comprîs ? (Lulu fét « oyi » avou s'tièsse).

Lulu (Al publik) ; Ça n'sint nén l'rôze li, tout çoula. Dji m'va candjî l'eûwe di m'roudje pèchon, mi.

Lulu s'éva aviè li p'tit cwin qu'il-aveut discouvru ènawére. (Côté jardin de l'avant-scène).

Lulu (Riwétant si p'tit cwin). Mins c'est trop bia in li çoula ! C'est co mia qui l'Club Med. Droci, ô mwins dji s'ré bén pôjêre, ... a yute dès wagnasses èt à môde dè rén ... dès assazins.

I couminche à arindjî sès afêres èyèt a z-amantchê si « p'tit twèt » avou tous sès cârtons.

Sin.ne 2 . (Lulu, Bruno, gârçon d'cafè).

Gârçon (Qui intère an courant). Ène sakwè qui va mô, Mossieû ? Dji pou vos-édî ?

Bruno Vrémint nén, tout va pou l'mia. Pouqwè dijéz ça ?

Gârçon (Si r'wétant tout bièsse). Dji n'sé nén, anfin dji n'sé pus, i m'chèneut awè ètindu criyî « A l'éde, ô s'coûrs ! »

Bruno (Après in momint di toûrpinemint). Â oyi, c'est mi qu'a criyî ça ... pou couyonér pace qui dji ... dji...dji more di swè, wèyèz.

Lulu (Al publik). Tous lès toûrs dins s'casaque !

Gârçon Scusèz-m' di vos-awè fé ratinde, savèz. Qwè-ce qui Mossieû purdra ?

Bruno Ène « Môrt Subite ».

Gârçon Ça, nos n'avons nén, Mossieû.

Lulu (Al publik) Li « môrt subite », à in rén près, c'èsteut pour mi.

Bruno D'abôrd, rén.

Gârçon Mins Mossieû dijeut qu'i moreut...

Bruno È bén, dji n'more pus, pwint. Ça vos disrindje ?

Gârçon Non, non, Mossieû. A vo sèrvice !

Bruno Nos-èstons bén d'acôrd. Asteûre, ... (I lî moustère pa in jèsse qu'i dwèt « spitér èvoye »).

Gârçon Bén, Mossieû. (I vûde, l'ér' tout sbarè).

Lulu Ça a stî dit ène miyète pus djintimint , mins tout compte fêt, (I r'fêt l'jèsse da Bruno) oudoubén « disgadjez ! » , c'est d'abôrd li min.me in.

Sin.ne 3.

(Lulu, Bruno, Cynthia).

Cynthia, ène djolîye djon.ne feume, arive. Si manière d'ièsse moustère cléremint qu'èle vout assatchî l'atincion dissus lèye. (Roudje cote fôrt coûte, blanc caraco, gros neûd a s'cô, blankès botes, Ène fleur dins sès tch'vias, cwèfès ène miyète al sôvâdje). Èle va s'achîr a ène tâbe si trouvant djusse a costè d' Bruno.

Lulu Mon diè, qué bia p'tit mouchon ! Bén damâdje qu'èle va djustumint s'achîr asto du mourzouk .

Bruno s'astampe èyèt va s'mète a ène tâbe pus lon.
Cynthia s'astampe a s'toù èyèt va si r'mète a ène tâbe a costè d' Bruno.

Bruno Ça vos-amûze ?

Cynthia Qué bia après-din.ner, n-do mossieû ! (Bruno ni rèspond nén èyèt riwète si monte).

Lulu A m'n-avis, ci p'tit pouyon –la n'èst nén co ô d'bout d'sès rûjes.

Cynthia In cièl ossi bleû qui vos îs ...

Bruno (Fôrt sètch). Is sont bruns.

Lulu Li v'la dèdjà asbleuwîye téns !

Cynthia ... lès carèsses du solia su no vizâdje, lès p'tits mouchons qui tchantenut, li brî-je qui bèrce nos pus doûcès pinséyes, ...

Bruno Èyèt lès an.mèrdeûzes qui câssenut lès orâyes ôzès djins, vos avèz rouvyî.

Lulu Oufiti, quén bèrlafe !

Cynthia Vos èstèz ârtisse ?

Bruno C'èst ça.

Cynthia Dji l'ôreu gadjî ... Vos n'mi d'mandèz nén pouqwè ?

Bruno Non.

Cynthia Nè l'purdèz nén mô, mins vo manière d'ièsse, vo façon d'ièsse abi-yî, vo..., anfin tout amon vos mi fét sondjî a èn-ârtisse.

Lulu È bén,i n'lf è fôt wére a ci p'tit pièrot-la.

Cynthia Mi-min.me, dispûs toudi, dj'ôreu v'lu ièsse èn-ârtisse. Dispûs mi pus tinre djon.nèsse, dji rêve di div'nu comèdiène, oubén tchanteûze, ou Bén danseûze ou Bén...

Bruno Vos m'sôlèz.

Cynthia Â , come dj'in.me lès-omes qu'ont du caractère come vos.

Bruno Vos mi stoufèz.

Cynthia (Èvoye dins sès nûwéyes). Li stoufichante tchaleû d'èn après-din.ner passè avou in vré ârtisse come vos ... Dji bwè vos paroles ... Continuèz !

Bruno Spitèz rad'mint èvoye, vos m'assoumèz, djondûwe.

Lulu Â la, pus clér' qui ça, ça n'sôreut l'ièsse.

Cynthia (Riv'nant dissus tère). Vos ... vos couyonèz ou Bén ...

Lulu Li, ... couyonér, ça m'sézireut fôrt.

Bruno Disparèchèz, bouboune di dicôce.

Cynthia (Qui s'astampe toute disbôtchîye, èt pwîs s'mèt a brère). Vos n'èstèz nèn ârtisse ! ... Pôve Cynthia, qui dj'seû maleûreûze ! (Su ç'tins-la, Ârmand vént d'intrér).

Sin.ne 4. (Lulu, Bruno, Cynthia, Ârmand).

Ârmand è-st-ène sôte di bribeû qui djoûwe dèl guitâre pou gagnî sakants côrs.

Ârmand I n'vos fôt nèn tchoûlér pou ça in, djolîye poupène, ... mi, djè l'seû ârtisse.

Bruno Mins ç'n'èst nèn l'vré in !

Ârmand Sifét, sifét, ... d'ayeûrs pou vos-è fé l'preûve, dji m'va vos djouwér in p'tit boukèt.

Bruno (Riwétant s'monte). Nèn dandji, on vos crwèt.

Cynthia Mi, dji vos trouve pus råde èn-ér' di bribeû qu'èn-ér' d'ârtisse savèz.

Bruno Djusse. Èyèt lès bribeûs n'ont rén a fé droci. Aléz, op', disgadjàz !

Lulu (Qui tchipote toudi dins sès-afères. Al publik). Â ça, gn-aveut lontins qui ça aveut stî dit.

Ârmand Ô la, ô la, i n'vos fôt nén margougnî Ârmand insi in.
(S'achîdant a l' tâbe a costè d' Bruno). Vos m' donèz ène pitite pîce èyèt dji vos fé intrér dins in monde di binôjeté di tindrèsse, d' amoûr, ...

Lulu Mi, dji pinse qui ça va Bén râde bouchî.

Cynthia (Sondjeûze). Dèl tindrèsse ! (A Ârmand). Tout compte fèt, vos couminchèz a m' plère. Vo st-intréye m' aveut ène miyète rafrwèdi, mins vos paroles vègnenut di m' rèstchôfèr l' keûr.

Ârmand Dj' é a pwin.ne dit deûs mots !

Cynthia (Vinant s' achîr a costè d' Ârmand). Nonfèt ... trwès ! ... Trwès mots, trwès mots d' ârtisse. (S'èvolant co dins lès nuwéyes). « Binôjeté, tindrèsse, amoûr » ... Vos-èstèz mi rè d' solia.

Lulu (Al publik, moustrant Bruno). Dji n' sé nén pouqwè, mins dj' é come dins l' idéye qui l' solia ni lûra pus lontins.

Cynthia (A Ârmand). Wèyèz, dispûs mi pus tinre djon.nèsse, dj' é toudi rèvè di div' nu comèdiène, oubén tchanteûze, oubén...

Bruno (Li côpant). ... danseûze, on sét, on sét.

Ârmand (A Bruno). Bén nonfèt, on n' sét nén.

Li g.s.m. da Bruno sone. I discrotche èyèt mèt s' visâdje su l' costè pou qu' on n' ètinde nén çu qu' i dit. Li dèvize ni dure qui sakants sègondes. (Li cén qui tèlèfone a stî dirindjî).

Ârmand (A Cynthia). Èyèt comint ç' qui vos vos lomèz, pitite sitwèle d' amoûr ?

Cynthia Cynthia ... Èyèt vos ?

Ârmand Mi, c' è-st-Ârmand, ... Ârmand di d' padrî l' bos.

Lulu (Vûdant di s' cwin èt dalant aviè lès deûs-ôtes , sins s' achîr). Tint qu' a fé, pusqu' on n-è-st-ôzès prézintâcions, mi, c' èst Lulu, ... Lulu, li léjionére ... Èyèt quand on mè l' dimande djintimint, dji sé poussî l' tchansonète. (Cynthia èt Ârmand s' astampenut).

Ârmand D' abôrd, a nos-ôtes deûs, nos alons fé ène vréye soce d' ârtisses in..., in « deûzio », come on dit.

Lulu Nén “deûzio” in, vî cous' ! In “Duo” !

Ârmand Oyi, c' èst ça qu' dji v' leu dîre.

Cynthia Èyèt mi la-d' dins, on m' rouvîye ?

- Ârmand** Nos f'rons ène « triplète » da d'abôrd.
- Lulu** Dijons pus râde in « Trio » qwè !
- Cynthia** Mi rêve, mi rêve qui wèt l'djoû !
- Ârmand** Wéte in pô l' fiére alûre qui no soce va awè ! On n'côzera pus qui d' l' « **ÂrLu-Cyne** » pa tous costès, vos p'lèz m'crwêre.
- Lulu** Di qwè qu't'as dit ?
- Ârmand** Di l' « **Ârlucyne** » ... (An-aspyant bén). **Âr**/mand, ... **Lu**/lu, ... **Cyn**/thia.
- Lulu** Bon, ... tout bon ça ! Ârmand djoûwe, Lulu tchante èyèt Cynthia... A, èyèt Cynthia, qwè-ce qu'èle fét, lèye ?
- Cynthia** Ô bén, dji ..., dji ...
- Lulu** Vos ... vos ... dansèz, èv'la !
- Cynthia** Dji danse ?
- Lu & Âr** (Èchène). Èle danse.
- Cynthia** Dji vos rabrèsse téns ! (Èle lès rabrèsse).
- Lulu** (Moustrant Bruno). Èyèt l'mô stichî, drola, s'i vout nos r'wétî, i n'ôra qu'a payî.
- Li g.s.m. da Bruno risone co.
- Bruno** (I discrotche an ténant lès-ôtes a gougne).
(Lès trwès féyenut chénance di continuwér a d'visér èchène).
(*Dj'é d'vu racrotchî, gn-aveut trop d'pourmèneûs dins l'cwin.*) **Li cwin èst bén pôjêre asteûre ?** (*Ça va. Dj'é dès nouvèles : li prîje a sî boune, li pèchon a agnî a l'ôzin*).
Li pèchon a agnî a l'ôzin? ... Bon ça ! (*In boukèt d'preumiêre qualité, sins arièsse èyèt tout fris'*.) **Wèy'wèy', in boukèt d'preumiêre qualité, sins arièsse èyèt tout fris', ... d'acôrd ... Èyèt a quène eûre èst-ce qui l'batia s'ra la ?** (*Li comande foûrnîye cazimint subito, ... dins l'bènitî.*) **Cazimint subito dins l'bènitî, ... impèc'.** (*Èyèt èwou-ce qui l'mindjî s'ra ?*) **Li mindjî du pèchon ? ... Dins l'papî « alu », ô fond du bènitî du Roudje Pichoulit, ça va ?** (*OK.*) **Atincion, pace qu'i gn-a dès djins su l'plâdje ! Ciao !** (Bruno racrotche).
- Lulu** (Qu'a assatchî Ârmand èt Cynthia ène miyète pus lon). Dji n'sé nén, mins ou bén èm' n-ome, il-èst pètè a make ou bén i trimpe dins dès salès eûwes in.
- Cynthia** Èyèt s' pèchon qu' arive pa batia, ... droci ... « subito dins l'bènitî », disti , c'èst vrémint dès comptes di cèrvia disfoncè in ça.
- Ârmand** Tafêtemint « disfoncè » ! In batia qui diskèrdje du pèchon dins in bènitî, ... bén, i fôt qu'on l'rèssère tout d'chûte dins ène tchambe dès sots, ci p'tit kinike-la.

- Cynthia** Dji n'vôreu toudi nén ièsse a l'place dès céns qui vont dalér trimpér leûs mwins dins l'eûwe bènite èyèt ramouyî leû front avou après.
- Lulu** Mins çu qui vos n'savèz nén co, c'èst qui djusse di d'avant qui vos n'arivêches, i fèyeut ène coumande d'ièbe.
- Ârmand** Dè l'ièbe pou noûri sès pèchons da quékefîye !
- Lulu** T'as dèdjà vèyu dès pèchons mindjî dè l'ièbe, twè ?
- Cynthia** Mi roudje pèchon, li, i mindje dès grin.nes è tous lès cas.
- Lulu** Alons, alons, in pèchon qui mindje dè l'ièbe, c'è-st-ossi râre qu'ène feume qui n' dispinse nén tous lès liârdès di s'n-ome in.
- Cynthia** Ç'n'èst nén djinti d'dîre ça.
- Ârmand** (A Lulu). Tu t'î conès dins lès feumes, twè ?
- Lulu** (Assatchant lès deûs-ôtes aviè « s'cwin »). Vinèz a m'môjone, on s'ra pus a s'n-ôje pou si d'visér.
- (Is s'èvent aviè « l'cwin » da Lulu).
- Cynthia** Vos dijèz ça dès feumes, quékefîye pace qui...
- Lulu** (Côpant Cynthia). ... pace qui, ... pace qui ... dji di ça pa èspéryince, pwint.
- Cynthia** Vos vikèz avou ène sakî d'abôrd ?
- Lulu** Pus asteûre, mins dj'é stî mâriè deûs côps. Deûs côps l'infiêr, èm' fîye !
- Ârmand** Mâriè ... avou ène feume ?
- Lulu** Bén oyi in, inocint. Avou quî-ce qui tu vous qu'ça fuche ?
- Cynthia** O, o, di nos djoûs, on lès wèt toutes in.
- Lulu** Swèt' ! Toudi èst-i qui l'preumiêre, dj'é d'vu ratinde dîj ans pou z-awè ène boune ocâzion di lî ofru dès fleûrs ... Ça a stî l'djoû di s'n-ètèremint.
- Cynthia** Dj'é dèdjà peû pou l'deûzième.
- Lulu** I n'vos fôt nén, ô! Dèl deûzième, dji m'é simplèmint divôrcè. Lès tôrts èstît pârtadjîs : cénquante pour cint dès tôrts pou m'feume èyèt ...
- Ârmand** ... èyèt cénquante pou twè, ça, Bén seûr.
- Lulu** (Pourchûvant). ... Èyèt lès-ôtes cénquante pou m'bèle-mame.

- Ârmand** Ba, s'on vout, li mâriâdje, c'est come ène loterîye in, Lulu.
- Lulu** Nén du tout. A l'loterîye, on pout télcôps gangnî !
Cynthia N'èspétche qui dès mâriâdjes d'amoûr, i gn-a tout d'min.me. Non ?
- Lulu** Ça, pou seûr qu'oyi.
- Cynthia** A ! Vos l'riconèchèz, c'est dèdjà ça.
- Lulu** Bén seûr. D'ayeûrs, wètèz, dj'é iun d'mès soçons qu'a fét in mâriâdje d'amoûr gn-a tout djusse èn-an. Come i wèyeut voltî lès liârd, i s'a mâriè avou ène feume fôrt ritche.
- Cynthia** È bén, môgré tout ç'qui vos p'lèz racontér dissus lès feumes, dji vos wè voltî, Lulu.
- Lulu** Mins mi ètou savèz, dji m'wè voltî.
- Ârmand** Tu n'sés jamés d'vizér pou d'bon sés-se, twè !
- Lulu** Dji d'vize pou d'bon. Si dji n'mi wèyeu nén voltî mi-min.me, quî-ce qui c'est qui tu vôreus qui l'f'reut ?
- Cynthia** Mi, dji vén d'vos l'dîre.
- Ârmand** Èt mi ètou, ... min.me si li p'tite a d'pus di..., anfin d'atoutes qui mi.
- Lulu** Â ça, s'i m'faleut chwèzi, dji n'balzinereu seûremint nén.
- Cynthia** Éy', lès deûs Casanova, èst-ce qui nos n'côzîs nén d'amanthî ène pitite soce nos-ôtes ?
- Ârmand** Seûr qui sifét èyèt dji m'va min.me vos djouwér in boukèt di m'n-èdvincion pou couminchî.
- Lulu** C'èst ça, djoûwe toudi t' boukèt pou vîr. Après, dji cacheré a mète dès paroles dissus.

Su l'tins qu'Ârmand djoûwe èyèt qui lès deûs-ôtes choûtenut, Bruno sôrt in moncha d'biyèts di s'potche, I lès èbale avou sogne dins du papî an-aluminium, an r'wétant di pa tous lès costès. I va mète li paquèt dins l'batch al bèrnate. (li bènît !!) Pwîs il-èrva a s'place come si rén n'èsteut. Lès trwès-ôtes n'ont rén vèyu.

Quand Ârmand a fini d'djouwér s' boukèt... (Vîr li pârticion a l'fén).

- Ârmand** Adon, qwè d'djéz di m'n-eûve ?
- Cynthia** C'è-st-ène muzique pou z-èdwârmu lès-èfants in li çoula. I fôt qui ça r' muwe pus'

qui ça in. C'è-st-ène sôrte di "rap", di "techno" qu'i fôreut, ... ène sakwè dès-anéyes deûs mile èyèt nén dèl Guêre Quatôze in.

Lulu Mi, ça m'bote. Nén dandjî d'ène muzique di sôvâdje !

Cynthia Comint v'léz qui dj'danse su ène mârche d'ètèremint, mi ?

Lulu Vos n'avèz qu'a vos disbrouyî. Quand on vout fé pârtîye du monde dès-ârtisses, è bèn, i fôt awè d'l'imadjinâcion.

Armand Lulu, avèz dèdjà ène pitite idéye pou lès paroles ?

Lulu Ça toûrne èt ça catoûrne dins m'tièsse. Dji crwè qui tout s'amantche bèn.

Cynthia On dîreut qui vos fèyèz ça sins mô ni rûje, vos !

Lulu (Moustrant s'tièsse). Éy', mins i gn-a savèz la-d'dins.

Armand Èvoye pou l'èpèticion d'abôrd !
Di d'avant, dji r'wète si lès cwades sont toudi d'alure.

Bruno (Al publik). Si cès trwès barakîs-la pourît continuwér a fé leûs sèndjerfîyes in p'tit momint, ça m'arindjereut vrémint bèn... (Fèyant sakants mawes). Oûû ! V'la qui dj'atrape mô m'vinte tout d'in còp téns ... Ou yayâye ... On dîreut dès crantches. ...Dji m'vas rad'mint fé l'mwin.nâdje. (I s'èva aviè l'cabarèt èt il-î muche).

Sin.ne 5. (Lulu, Cynthia, Armand).

Armand C'èst bon. On î va.
Trwès / quate ! (Muzique èyèt tchanson di « Nos-èstons lès bèrdjîs. »)

Armand djoûwe, Lulu tchante èyèt Cynthia cache a trouver dès pas.

Sin.ne 6. (Lulu, Cynthia, Armand, Mârgot).

Su l'tins qui lès trwès-ôtes sont st-an plène rèpèticion, Mârgot, ène sôléye, botéye al chîj' quate deûs, intère an bèrlökant. Èle tchante an bwêrlant di toutes sès fwaces èyèt come...ène feume t't-a fèt chiftéye.

(Air de « Mon mari le sot » - Chanson populaire -)

Èm' couzin André
Ni bwèt jamés d'vén,
Ô la la la la (bis).
Ni bwèt jamés d'bîre,
Trèbuke su ène pîre,
Ô la la la la (bis).
V'la qu'i s'câsse li tièsse,
C'è-st-ène vréye grosse bièsse.

Ô la...

Trwès-ôtes

Ô,...ô, ...ô,...ô !!!

Lulu

Arètèz vo flûtindje in, s'i vos plét ! On n's'ètint pus li droci.

Mârgot

Vos tchan.. .tchantèz, dji tchante, NOS TCHAN...TONS !

Cynthia

Gn-a vo goyî qui va s'dissètchî a bwêrlér insi.

Lès trwès-ôtes s'arètenut in momint d'rèpètér.

Mârgot

Éy' éy', c'est vré ça. Mins ça n'a, ça nana, ... anfin ça tché bèn , pusqui dji more di swè asto d'in cabarèt, non, non, c'est l'contrére qui dji v'leu dîre ... Pfff, dji n'sé pus qwè mi , è définitif.

(S'achîdant a ène tâbe èyèt criyant après l'gârçon). Gââârçon, ène feume more di swè droci !

Gââârçon, abîye s'i vos plét !

Li gârçon arive.

Lès trwès-ôtes féyenu chènance di tchafyî èchène.

Sin.ne 7.

(Lès min.mes + li gârçon).

Gârçon

Dji seû la, madame, dji seû la.

Mârgot

(Dèvizant come ène sakî d'chiftè). Dji seû Madame Mârgot,... Miss Tchèss'lèt,... Miss « tûteûse di pintes »,... li rin.ne dèl vile.

Gârçon

Èyèt qwè-ce qui Miss...Mârgot vôteut bèn ?

Mârgot

Ène "Môrt Subite".

Gârçon

Ça, maleûreûzemint, dji n'èn-n-é pont.

Mârgot

Vos n'avèz pont d' « Môrt Subite » pou Madame... Miss Mârgot... (avou l'acsint d'Bruxelles) « Aléy', dis ! »
D'abôrd, chèrvèz-m' in « Cannibale », dji crève di fwin.

Gârçon

(R'wétant tout bièsse). In ... ?

Mârgot

Oyi, ène boune trince dè pwin avou in spès boukèt d'tchô d'ssus , qwè... èyèt in richot d'sôce tartâre ... pou qui ça brotche bèn di pa t't-avô tout la.

Gârçon

Vrémint disbôtchî savèz, mins droci, on n'chèrve nèn a mindjî.

Mârgot

Qwè-ce qu'on chèrve d'abôrd droci ? ... Pont d' « Môrt Subite »,... pont

d'« Cannibale », ...

Gârçon
Mârgot

C'èst qui dji n'seû nén l'patron, wèyèz, èyèt...
Gn-a rén avou ça, m'gamin, Mârgot si disbrouyera bèn toute seûle.
Vos p'lèz fé d'méye toû.

Gârçon

(S'èdalant). A vo sèrvice, Madame.

Sin.ne 8.

(Lulu, Cynthia, Ârmand, Mârgot).

Mârgot s'astampe èyèt s'èva aviè l'batch al bèrnate.

Mârgot

(Soulèvant l'couviète). Lès djins tapenut souvint dès trésôrs li la-d'dins.
Bén-astcheût qui dji n'trouvereu nén ène pitite sakwè pou mi r'guèdér..
(R'nachant dins l'batch). Tu n'vérras nén m'dîre in ... Ça s'reut bèn
l'preumî côp qui ... Ène pére di vîs solés, ça n'si mindje nén, ... dès pa-
pîs tout crôs non pus, ... (Skeûjant s'mwin). Qwè-ce qui c'èst qui ç'sa-
loperiyè-la qui clape insi on ? Bèèk... in boukèt d' tchoum'gam' ! (Co
après in momint). A â ! ... Du papî aluminom', ... ça poureut quékefiye
bén ièsse li pèche ôs mirakes !

Mârgot disbale li paquèt su l'tins qui Cynthia, Ârmand èyèt Lulu ricouminchenut lèu rèpèticion.

Après in côurt momint, Mârgot tchétt ... su lès liârd da Bruno !

Mârgot

(R'wétant come ène bèrlûwe). A bèn ça, Sinte Camomîye dèl Môrt
Subite du Cannibale ! (Riwétant lès biyèts come s'èle n'ariveut nén a î
crwêre). È bèn la, dj'é l'apétit côpè in.
(S'èdalant aviè lès trwès-ôtes, an bwêrlant èyèt an moustrant lès biyèts).
In TRÉSÔR !! ... Dji vén d' discouvru in trésôr !

Lès trwès-ôtes s'arètenut d'ène traque.

Lulu

Mins c'è-st-in bègnon d'côrs qui vos t'nèz la dins vos mwins !

Cynthia

Dji poureu dèdja m'achetér sakants abîyemints, mi, avou ça.

Ârmand

D'èwou-ce qui ça vént ça ?

Mârgot

Dji cacheu après du mindjî dins l'batch al bèrnate quand...

Lulu

(Al publik). Li mindjî du pèchon !! (Moustrant lès liârd). Dj'é tout com-
prîs, ... Li mindjî du pèchon dins l'bènitî du Roudje Pichoult,...c'èst bèn
ça,...c'èst nos qui l'avons.

Ârmand I vos fôt r'mète ça tout d'chûte èwou-ce qui vos l'avèz prîs in.

Lulu (A Ârmand). Rimète ça a place, mins t'ès li rwè dès tokès, twè !
Mârgot Dji n'l'é nén prîs, dji vos di qui dj'é trovè ça an cachant après a mindjî.
Dj'é tcheût d'ssus insi a l'askèyance.

Cynthia (A Mârgot, moustrant l'batch al bèrnate). C'èst Bén lôvô qui vos avèz trovè ça ?

Mârgot Oyi, pusqui dj'vos l'di... Drola dins l'tonia.

Cynthia C'èst l'vré qu'i fôreut quékefîye...

Lulu (Côpant Cynthia). ... qu'i fôreut rén du tout.
(A Cynthia). Vos mètèz vos liârds dins in batch, vos ?

Cynthia Bêêê...

Lulu NON ! Nos stons Bén d'acôrd.
(A Ârmand). Èyèt vos, Ârmand ?

Ârmand Bé, c'èst qui mi, ...

Lulu Vos non pus, c'èst Bén çu qui dj'pinseu.

Mârgot Mi, çu qui dj'pinse, c'èst qu'on duvreut bwêre in bon côp èchène pou fièstér ça.

Lulu Nos bwêrons pus tôrd, gn-a ène sakwè d'pus prèssant qu'ça a fé pou l'momint.

Mârgot Gn-a rén d'ôte qui poureut prèssér d'pus pour mi qu'ène «Môrt Subite ».

Lulu Èyèt mi, dji di qu'i fôt l'luvér li pus râde possibe avou lès côrs, pace qui sins ça, nos pourîs l'awè tèrtous pou d'bon...èyèt tout d'chûte, li « môrt subite ».

Cynthia Dji n'comprend rén a rén. Vos m'fèyèz awè peû, Lulu.

Ârmand Mi, dji di qui tout ça n'sint nén bon.

Lulu Bon, ô diâle lès chitârd ! Mi, dj'é ène idéye di Dieu le Père.

Mârgot I n'a nén swè, li, vo Dieu le ... ?

Lulu Aléz op', on pète èvoye sins tôrdjî. Pârtis pôves come Djob, nos r'vènrans kimpès come dès mènîrs.

Mârgot Èyèt mès « Môrt Su... »

Lulu ... Vos pourèz Bén râde è cassî dès tonias ètîres, fwè d'Lulu.

Armand Dji vôleu tout d'min.me bèn qu'on m'èsplique...

Lulu On l'luve è preumî. Dji splikeré tout après.

Lulu boure lès-ôtes ô cu .

Cynthia Èyèt no limèrô d'ârtisses, qwè-ce qu'i d'vent, li ?

Lulu Quand nos r'vénrons, nos s'rons pus dès-ârtisses, nos s'rons dès STARS, dès « MEGA STARS », fèyèz-m' confyince. (Bourant co lès-ôtes sins rat'na). Aléz in , pace qui dji sin qu'on djoûwe avou l'feu asteûre.

Is vûdenut têtous l'ér' sbarè èyèt an rouskayant dissus Lulu.

Li sin.ne dèmeure vûde in bon momint èyèt on ètint ène musique da Moricone. (L'érâdje dwèt ièsse **mistérieûs**).

SIN.NE 9. (Lysiane, Bruno).

Lysiane intère. C'è-st-ène djon.ne feume qui n'a nén l'ér' fôrt à s'n-ôje ; èle fèt sakants pas èt pwîs s'arète. On dîreut qu'èle si d'mande s'èle è-st-a l'bonne place.

Èle pôrte ène blanke marone « corsére » èyèt ène djan.ne taye avou dès finès bèrtèles.

Èle a in rôze turban dissus s'tièsse èyèt dès sandalètes a sès pîds. Èle pôrte ène valîje qui chène asséz pèzante.

Bruno (Rintrant avou in léd vizâdje). Dji m'dimande toudi bèn pouqwè ç'qui dj'é ieû cès man.nèstés di crantches-la ... Çà n'èsteut vrémint nén l'momint. (Si rindant seûl'mint compte). Téns, tous lès rats ont quittè l'batia come dji wè ! Bon disbaras ! ... Qui dj'î sondje, dji f'reu bèn di r'wétî si l'fourni-cheû n'èst nén passè. (I s'aprèste a soulèvér l'couviète du batch quand...)

Lysiane Mossieû,...

Bruno Madame,...

Lysiane C'èst bèn vos qui... ?

Bruno qui... ?

Lysiane Bêê, ... qui dwèt m'ratinde « Ô Roudje Pichoulit », qwè ?

Bruno Si c'èst Manu qui vos-èveye, oyi.

- Lysiane** Manu ! Quén Manu ? Mi, c'è-st-in Jérôme qui dj' dwè rèscontrér.
- Bruno** (Al publik). Oû la, atincion ! L'afêre couminche a s'coumelér.
(A Lysiane). Fuchons clér' , s'i vos plét! Dins vo valîje drola, (I mous-tère li valîje). c'èst dèl martchandîje pou quî qui vos-avèz ?
- Lysiane** Dèl martchandîje, dèl martchandîje ! Vos avèz iène di cès manières di cô-zér, vos.
- Bruno** Swèt', on s'comprint.
- Lysiane** Nén du tout. Vos-èstèz Jérôme ou Bén non ?
- Bruno** Â ça, dji pou vos asseûrér qu'non.
- Lysiane** In bia rêve qui s'èvele ! ...Èyèt quî-ce qui vos-èstèz d'abôrd ?
- Bruno** Pèrsone.
- Lysiane** Vos-èstèz don « pèrsone » qui dwèt rèscontrér « ène sakî », come dji pou comprinde ?
- Bruno** S'on vout. Mi, c'èst l'pèchon da Manu qui dj'ratind.
- Lysiane** Manu qui m'èvoyereut avou du pèchon, Jérôme qu'èst « pèrsone », c'èst m'rinde maboule qui vos cachèz a fé.
- Bruno** Djouwons franc djè ! S'on poureut dèdjà sawè çu qu'i gn-a dins vo valîje, tout poureut seûremint s'rascléri tout d'chûte.
- Lysiane** A côp seûr, dji n'é pont d'pèchon, crwèyèz-m'.
- Bruno** Mins co ?
- Lysiane** Dès tayas, dès caracos, in moncha d'cotes a finte èyèt a volants, dès marones, dès foûrôs, dès tchôsses, dès solés,... Dji pou ralondjî l'lisse si ça vos fét pléji..
- Bruno** Nén dandji. Lès loques èt lès tchôssures ni m'intèressent nén.
- Lysiane** Éy' la, doûcemint in, dès lokes, dès lokes, rén qu'dès bias abîyemints, èyèt tètous dèl dérène môde, marchand d'pèchons.
- Bruno** Ostant ièsse marchand d'pèchons qui martchande di loques.
- Lysiane** Vos stèz in vré mô alevé, mins dji vos èsplique tout d'min.me.
- Bruno** Nén l'tins d'vos choûté. Vos f' rîz d'ayeûrs mia d'alér vîr si vo Jérôme ni vos ratint nén ôte pô.

- Lysiane** Rén du tout. Vos v'îlz sawè, è bèn vos alèz sawè.
Gn-a quénze djoûs, dj' é mètu ène anonce dins l'gazète : dj'aveu l'invêye di rèscontrer ène sakî ... Èn-ome lomè Jérôme m'a rèspondu èt i m'a donè li « Roudje Pichoulit » come place di rèsconte.
- Bruno** Pou in limèrò d' disbotâdje d'abôrd si dj'vos sézi bèn ?
- Lysiane** Disbôtchêye di vos dèsminti, chér Mossieû, mins nos duvîs nos-èvolér pou l'Maroc.
- Bruno** Lès afêres routenut râde avou vos. Bèn damâdje pour mi qui vo Jérôme n'èst nèn la ! Vos s'rîz dèdjà lon di d'ci asteûre.
- Lysiane** Gn-a co rén d'mô fêt ... Si vos v'lèz m'èmwîn.nér , min.me... è batia d'pècheû, è bèn, dji vos chû, tènèz.
- Bruno** (Al publik). Èyèt ç' tèle-la, li tram qui l'a pokè ni roule seûremint pus.
(A Lysiane, si mwéjichant). Choûtèz bèn in : gn-a pont d'Jérôme droci, gn-a jamés pont ieû èyèt i n'd'ôra jamés pont... Asteûre, vos disgadjèz al dadaye.

Sin.ne 10. (Bruno, Lysiane, Manu).

Manu intère sins rén dire, an tènànt in paquèt pa-d'zous s'brès. I pôrte ène marone è bleuw vè-loûr, in gros jèrsè èyèt ène calote di batelî su s'tièsse. A sès pîds : dès gros solés.
I s'èdale tout d'chûte aviè l'batch al bèrnate, mins...

- Lysiane** (Plondjant dissus Manu). Jérôme ! Dji wadje qui vos-èstèz Jérôme.
- Bruno** (Cachant a rastènu Lysiane). Disgadjèz, qui dj'vos-é dit !
C'èst m'pèchon.
- Lysiane** Dji saveu qui vos vénrîz ! (Èle cache a donér in bètch a Manu èyèt l'fêt trèbukér su l'valîje).

Manu apice li valîje, l'èvoye ô diâle bèn lon, pwîs pourchût si tch'min, toudi sins dire in mot. Lysiane s'èva ramassèr l'valîje an brèyant, l'astampe èyèt s'achît dissus come ène moyèle.

Lysiane (Al publik). Ça n'èsteut nèn Jérôme non pus.

Su ç'tins-la, Manu fougne dins l'batch al bèrnate, mins ni trouve rén, ... bèn seûr.
Bruno pèstèle.

Manu (Si r'toûrnant aviè Bruno). Li mindjî ?
Bruno (Dèvizant drwèt pa-d'vant li, toûrnant l'dos a Manu). Qwè, li mindjî ?

Manu Èwou?

Bruno Come conv'nu, dins l' fond du bènitî.

Lysiane (D'in bièsse ér'). Dins in bènitî, vos n'trouverèz qui d'l'eûwe bènite savèz.

Manu (A Lysiane) Vos, l'brèyôde, on n'vos d'mande nén d'toussî.
(A Bruno). Gn-a rén !!!

Bruno (Toudi dos toûrnè a Manu). Dins l'papî « alu ».

Manu (Continuwant a r'nachî, pwîs si r'toûrnant d'ène traque, è colére). Tu djouwes avou mès ôrtès ou Bén qwè ?

Bruno (S'èdalant aviè l'batch al bèrnate).I vos fôt fé ravisér vos ouys sins tôrdjî.
(Riwétant a s'toù dins l'batch). Lèyèz-m' vîr ça !

Lysiane Si vos m'dîrîz vrémint après qwè-ce qui vos cachèz, quékefîye qui dj' poureu vos-édî.

Manu C'est **lèye** !

Bruno (R'lèvant s'tièsse). Qwè, ... « c'est lèye » ?

Manu C'est lèye qu'a scrotè lès liârd, ... (I si r'print) anfin, li mindjî, v'leu dje dîre.

Lysiane Scrotér du mindjî ? Mins dji n'é nén fwin, mi.

Bruno (S'astampant). Sifét, sifét, vos m'avèz dit ènawére qui vos-avîz fwin d'amoûr.

Lysiane Djustèmint, gn-a pont d'amoûr dins vo ... bèni...batch tout d'min.me !

Bruno Min.me qui vos pârlîz d'alér ô Maroc...

Lysiane Nén avou du mindjî in.

Manu (A Lysiane). Nén avou dès târtines, ça, djè l'vou crwêre.
(A Bruno). Mins, a propôs, vos avèz l'ér' di Bén l'conèche, vos, li bèle Loulou !

Bruno Nén du tout, dji n'sé nén d'djà comint-ce qu'èle si lome.

Lysiane N'èspètche qui si vos l'ôrîz v'lu, dj'èsteu prèsse a vos chûre la èwou-ce

qui vos ôrîz stî, ... min.me è batia.

Manu

(Si mêtant è colére).Â, dji couminche a comprinde l'istwêre asteûre, fâde satcheû d'plans. È bén, vo pèchon, vos l'ach'trèz a Casablanca, pouîri clatcheû. (I s'aprèste a pârti).

Bruno

Dji n'é rén a vîr avou ç' n- apotikére-la, crwêyèz-m'. D'ayeûrs, c'è-st-in Jérôme qu'èle ratindeut. Souv'nèz vos, èle vos-a min.me prîs pour li a vo st-arivéye.

Manu

Di toute manière, « pont d'mindjî », « pont d'pèchon »,

Lysiane

Vos stèz don Manu, l'ome qui apwârte li pèchon ?

Manu

(A Bruno). Pace qui ça ètou, èle li sét ?

Bruno

In momint, dji vos èsplique ...

Manu

Ç'côp-ci, c'ènn-n-èst d'trop, vos avèz satchî vo dérène cårtouche èyèt vo matante s'ra div'nûwe mounonke quand dji vos-apwârteré co dèl mar-tchandîje..

Bruno

Mins dijèz lî don, dijèz lî qui...

Lysiane

Li pèchon couminche a sinte mwés, dji ... **disgadje** ! (Èle s'aprèste a pârti).

Bruno

(L'apiçant pa in brès). Lès liârds, lès liârds è preumî !

Manu

Li pècheû, c'èst mi. Lès liârds, c'èst pour mi.
(Apiçant Lysiane pa s'n-ôte brès). Vos m'donèz lès liârds èyèt dji vos done li pèchon.

Lysiane

I vos manque a côp seûr ène pane a tous lès deûs.
Du pèchon, du mindjî , dèz liârds, in bènîtî, ... dji n'comprend rén a vo lingâdje di djondus.
(Bwêrlant). Dji n'é pont di liârds èyèt dji n'vou pont d'pèchon, c'èst clér' ?

Bruno

(An skeûjant Lysiane). Tèjèz-vos, on poureut nos ètinde !

Lysiane

(Bwêrlant co).Ça n'mi fèt nèn peû, dji n'é rén a mi r'prochî, mi.

Manu

(Apiçant Lysiane pa lès tch'vias). On vos dit d'vos téré.

Lysiane

(Di toutes sès fwaces). A l'éde, a l'éde, ô s'coûrs ! Ô... (Bruno li stitche rad'mint in mouchwè d'potche dins s'bouche).

Sin.ne 11 .

(Bruno, Lysiane, Manu, li gârçon).

Intréye du gârçon. Il-arive an courant èt pwîs s'arète tout d'ène traque an wèyant l'sin.ne.

Gârçon

(Didins lès coulisses). Dj'arive, dj'arive, ça n's'ra jamés...

(An n-intrant). ... qui l'deûzième còp ôdjoûrdu.

(An s'arètant, al publik). Â bén la, djè l'tén mi « Mòrt Subite »

(A Bruno èyèt Manu). Mins qwè fèyéz on ? Arètèz, vos alèz l'cochî.

Manu

Mins c'èst seûl'mint in djeu in. (Lysiane cache a s'èrbèlér).

Bruno

C'èst djusse pou s'amûzér, va.

Èt pwîs, après tout, èst-ce qu'on vos-a d'mandè ène sakwè ?

Gârçon

Èscuzèz--m' di vos-awè disrindjî.

Sin.ne 12 .

(Lès min.mes + mèsse du djeu).

Mèsse du djeu

(Intrant al dadaye). Mins ça n'va nén in ça. On maltréte ène feume pa-d'avant vos ouys èyèt tout ç'qui vos trouvèz a dîre, c'èst « Èscuzèz-m' di vos-awè disrindjî »

Gârçon

C'èst pourtant çu qu' l'ôteûr a scrît.

Mèsse du djeu

È bén, c'èst qu' l'ôteûr ni vôt nén ène chalote d'abôrd. On r'print ça.

Gârçon

Èyèt qwè-ce qui dj'di ?

Mèsse du djeu

Rén. Vos plondjèz tout d'chûte su lès deûs boûrias èyèt vos lès stôrez al tête. (I vûde).

Li gârçon sòrt, rivént tout d'chûte su l'sin.ne, si pèke su Manu èt Bruno èyèt lès stôre al tête an dijant : « Èscuzèz-m', mins ça n'èst nén mi lès côzes savèz ! »

Sin.ne 13 .

(Bruno, Lysiane, Manu, Gârçon + Lulu, Cynthia, Ârmand, Mârgot).

Lulu, Cynthia, Ârmand èyèt Mârgot rintèrenut botès avou dès tout novias moussemints èt dès instrumints d'musique tout lûjants.

Lysiane rissatche li mouchwè d'potche di s'bouche èyèt d'meure toute bièsse dissus place.

Lulu

Èscuzèz-nos d' vos disrindjî !

Bruno èyèt Manu si rastampenut avou sakants rûjes.

Ârmand

Come djè l'wè, gn-a du mouvemint droci.

- Gârçon** Mi, dji i n'é toudi rén à vîr dins ç rêmou-la ... Çà, dji pou vos l'cèrtifyî in.
(I vûde).
- Sin.ne 14 .** (Lès min.mes sins l'gârçon).
- Bruno** Quî èstéz ?
- Lysiane** Gn-ôreut-i nén in « Jérôme » dins vos-ôtes quékefiye ?
- Ârmand** Pont d'Jérôme, èm' fîye. Nos, nos-èstons l' « **Ârlucyne** ».
- Lulu** Èt asteûre, avou Mârgot qu'èst d'dins, on pout min.me dîre li « **Mârlucyne** ».
- Bruno** Quate tokès a make vûdant d'ène môjone di sots, qwè.
- Cynthia** Vos n'nos r'conèchèz nén ? Alons, l'Ârlucyne, ça dwèt vos dîre ène sakwè pourtant ?
Lès môbèlèrs qui vos avîz v'lu fé disgadjî la,... vos n'vos souv'nèz nén ?
Aléz, sifét in !...È Bén, nos riv'la è tchô èyèt è n-ochas.
- Bruno** Vos clapèz co d'pus qui...
- Lulu** (Lî côpant l'parole). Pont d'malonètreatès, s'i vos plét.
- Bruno** Dji vos done ène munute pou...
- Ârmand** Â non, nos stons ci dins nos cayôs. Nos comptons Bén î d'meurér èyèt î assatchî in moncha d'djins surtout.
- Cynthia** Bén râde, vos pourèz min.me vîr dès pancâtes dins toute li vile :
Li « **Mârlucyne** » è r'prézintâcion ô « **Roudje Pichoulit** ».
- Lulu** Ç' n'èst nén bia li çoula ?
- Mârgot** In cwin d'rève, vos di-dje ... vrémint ène bèrnate ô trésôr. (S'èdalant aviè l'bèrnate) Dji m'èva d'ayeûrs vîr s'i gn-a nén co sakants biyèts d'muchîs d'dins, téns.
- Lès 3 ôtes** Mârgot !!!
- Manu** Mi **mindjî** ! Lès scroteûs di m'mindjî !!!
- Mârgot** Non fét, non fét, nén du « mindjî », dès bias p'tits biyèts fachîs dins du papî « alu »...
- Lès 3 ôtes** MÂRGOT !!!
- Bruno** On lès tént.

Lulu Éy', lèbon insi avou vos clônerîyes ! Vo mindjî, vo pèchon, vo bènîtî, vo batia, vo n-ièbe mougnyè pôzès vatches, nos avons tout comprîs in.

Manu Binde di disgoustants profiteûs qu'vos-èstèz !

Lysiane Crèpètârd di Jérôme, èvou-ce qui vos m'avèz èmwin.nè ?

Ârmand (A Bruno èyèt Manu) Vo saloperîye d'ièbe...

Cynthia Vo man.nèsté d'came ...

Mârgot Èyèt vos p'tits biyèts...

Lès 3 ôtes **MÂRGOT !!!**

Manu Rindèz-m' mès liârdz tout d'chûte, c'èst da mi !

Bruno Èvou-ce qui t'as stî vîr djouwér ça ? C'èst **mès** liârdz !

Lulu Ça n'chève a rén di vos dismalfutér insi savèz. V'léz qui dj'vos dîje ?... Vos liârdz in, è bèn,...vèlzès ci ! (I moustère lès moussemintz èyèt lès instrumints d'musique).
Asteûre, vos p'lèz alér mougnyè vo mwéche ièbe avou lès vatches, si ça vos dit.
Èyèt fuchèz bèn binôjes qu'on n'prévègne nèn l'police surtout !

Bruno Skivetons rad'mint, Manu ! On èst cût.

Bruno èyèt Manu s'èvont sins d'mandér leû rèsse.

Sin.ne 15 (Lysiane, Ârmand, Lulu, Cynthia, Mârgot).

Lysiane Èt qwè-ce qui dji d'vén mi dins ç't-afêre-la ?

Ârmand Ça n'vos pléreut nèn di fé pârtîye d'no soce ?

Lysiane Ô qui sifét, mins maleûrèuzemint dji n'seû nèn ârtisse savèz, mi.

Lulu Pont d'imbaras avou ça. Vos, vos vos continterèz d'ramassér lès liârdz qui lès djins doneront avou Mârgot... Vos l'avèz bèn gangnî.

Mârgot Â ça, lès liârdz, c'èst toute mi fwace in, mi.
... Mins qui dj'î pinse,... i nos fôra co candjî l'nom dèl soce d'abôrd ?

Lès 4 ôtes **MÂRGOT !!!**

Cynthia Gn-a nèn a dîre, mins l'batch al bèrnate du « Roudje Pichoulit », pou nos-ôtes, il-èst **vrémint bèni** in.

Lulu (An sclatant d'rîre). Comint v'léz qu'il-è fuche ôtrèmint pusqui c'è st-in

bènitî !!!

FÉN.